

## CAPUT XVIII.

## STIRPIS ENUMERATIO.

1. ILLE hostium coercitor e regis *Nishadhensis* filia genuit puerum, robore suo ne *Nishadha* serpente quidem inferiorem, quem *NISHADHÆ* nomine appellant.

2. *KUMUDVATIS* filius, sono reliquisque rebus sensualibus per longum tempus pro libidine fruitus, postquam nomen regium filio tradidisset, ascendit in cœlum, quod factis suis, *Nymphææ* instar candidis, meruerat.

3. *KUSÆ* etiam nepos, cujus oculi loti foliis similes erant, mente oceani instar profunda, solus heros, brachiis urbis obicis instar longis, moderabatur terram, oceano cinctam, atque una tantum umbella regia præditam.

4. Post ejus mortem filius *NALAS* appellatus, ignis potentia præditus, stirpis dignitatem accepit, qui vultu loti instar fulgente, velut elephante calamos, sic hostium copias contrivit.

5. Ille, cujus gloria a diis in æthere habitantibus cantabatur, filium adeptus est, corpore cœli instar cæruleo, *NABHASIS* nomine appellatum, atque civibus æque ac *Srâvanas* mensis gratum.

6. Virtutis studiosus cum potenti illi *Kosalæ* septentrionalis imperium tradidisset, corpus ultra non ingressurus, senectute suadente amicitiam contraxit cum feris.

7. Ille regibus invictus, veluti *Pundarîkas* elephantis, filium genuit *PUNDARÎKAM*, ad quem, patre mortuo, velut ad *VISHNUEM*, accessit *LAKSHMIS*.